

আদর্শ ছেলে

(কুসুমকুমারী দাশ)

আমাদের দেশে হবে সেই ছেলে কবে ?
কথায় না বড় হ'য়ে কাজে বড় হবে;
মুখে হাসি, বুকে বল, তেজে ভরা মন,
'মানুষ' হইতে হবে, - এই তার পণ ।

বিপদ আসিলে কাছে, হও আগুয়ান,
নাই কি শরীরে তব রক্ত, মাংস, প্রাণ ?
হাত, পা সবারি আছে, মিছে কেন ভয়,
চেতনা রয়েছে যার, সে কি পড়ে রয় ?
সে ছেলে কে চায় বল ? — কথায় কথায়,
আসে যার চোখে জল, মাথা ঘুরে যায় !
সদা প্রাণে হাসি মুখে কর এই পণ —
'মানুষ' হইতে হবে, মানুষ যখন ।

কৃষকের শিশু কিংবা রাজার কুমার,
সবারই রয়েছে কাজ, এ বিশ্ব মাঝার,
হাতে প্রাণে, খাট সবে, শক্তি কর দান,
তোমরা 'মানুষ' হলে, দেশের কল্যাণ ।

জেনে রাখো

পণ — প্রতিজ্ঞা

আগুয়ান — এগিয়ে যাওয়া

চেতনা — হুঁশ, জ্ঞান

মাঝার — মাঝখানে

কৃষক — যে চাষের কাজ করে

কল্যাণ — ভালো, মঙ্গল

শক্তি — ক্ষমতা

সদা — সব সময়

আদর্শ — যাকে অনুকরণ করা যায় অর্থাৎ যাকে দেখে শেখা যায়, শ্রেষ্ঠ।

কাব্য পরিচয়

কবি চাইছেন, আমাদের দেশের ছেলে-মেয়েরা কাজে বড় হোক, শুধু কথায় নয়। হাসি মুখে শরীরে ও মনে সাহস নিয়ে সত্যিকারের 'মানুষ' হবার শপথ নিক।

বিপদ এলে, ভয় না পেয়ে এগিয়ে যেতে হবে। যারা দুর্বল তাদের কেউ পছন্দ করে না। কৃষকের শিশু অথবা রাজার কুমার সকলকেই এ পৃথিবীতে কাজ করতে হবে। কাজের মধ্য দিয়েই নিজেকে মানুষ হিসাবে প্রমাণ করতে হয়। এরা মানুষ হলেই দেশ ও দশের কল্যাণ।

পাঠবোধ

সঠিক শব্দ দিয়ে খালি জায়গা ভরো

1. কথায় না বড় হয়ে বড় হবে।.....

(ক) বলে

(খ) হাসিতে

(গ) কাজে

2. কৃষকের কিংবা রাজার কুমার ।

(ক) ছেলে

(খ) শিশু

(গ) ভাই

অতি সংক্ষেপে লেখো

3. বিপদ এলে কী করতে হবে ?

4. কিসে বড় হতে হবে ?

5. কী হবার জন্য পণ করতে হয় ?

সংক্ষেপে লেখো

6. কোন্ ছেলেকে কেউ চায়না ?

7. মানুষ হয়ে জন্মালে কী হবার জন্য পণ করতে হবে ?

8. “চেতনা রয়েছে যার, সে কি পড়ে রয় ?” — এ কথা কেন বলা হয়েছে ?

বিস্তারিতভাবে লেখো

9. আদর্শ ছেলে কাকে বলা হয়েছে ? আদর্শ ছেলে হবার জন্য কী কী করতে হবে ?

10. ছেলে মেয়েরা মানুষ হলে দেশের কল্যাণ হবে কেন ? বুঝিয়ে লেখো ।

ব্যাকরণ ও নিয়মিত

1. বাক্য তৈরি করো

পণ

আগুয়ান

কৃষক

চেতনা

বিপদ

তেজ

2. বিপরীত শব্দ লেখো

মানুষ

হাসি

কাজ

ভয়

বড়

কল্যাণ

3. নিচের শব্দগুলির ঠিক বানানটি লেখো

মানুস / মানুষ

কল্যান / কল্যাণ

দেস / দেশ

কৃসক / কৃষক

আদর্ষ / আদর্শ

শিশু / শিশু

